

2. Juni

Ineqarnermut akiliutit qaffakkiartuinnartut, kiisalu boligsikring tapiissutit qaffanneqarnisaat, aammalu kiassarnermut akiliutit qaffasippallaarnerat pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen, Partii Naleraq)

Inatsisartunut ilaasortap Hans Enoksen Partii Naleqqamiik oqallinnissamik siunnersuutaanut imaattumik oqaaseqassuugut.

Upernaaq manna ineqarnernut tunngatillugu arlalinnik oqaluserisaqarpugut. Assortuussutaanngivittumillu iluarsartuussisoqarnissaa tamavitta kissaatigigatsigu maanngaanniik oqariartuutigisaqattaarlutigu.

Upernaaq manna eqqartukkatsinnut aalajangiiffigisatsinnullu ilaavoq imm. 53. tassaasoq;

”Innuttaasut immikkut tamarmik kiassarnermut atukkaminnik taamaallaat akiliisaleqqullugit, Nukissiorfinnit kiassarneqartut tamarmik immikkut uutuutilersorneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut”

Tassani aalajangerpugut nunatsinni tamarmi inissiani najugaqartut tamarmik immikkut kiassarnermut uuttortaateqalernissaat siunertaralugu Naalakkersuisut nassuiaammik suliaqassasut.

Ukiut ilaqartarput sila issaasannerulluni. Aammali silaannaap allanngoriartorneranik sunnerneqartumik ukiut ilaqarput issinnerujussuusartumik. Tamatuma kingunerisarpaa kiassarnermut atugaasut qaffariarnerat. Tamannalu ineqartup akiliutaanut sunniisarpoq naak ini najugaqarfik nutaanngoriartunngikkaluartoq anginerusumik akiliuteqartoqalersarluni.

Uanilu taanngitsoorsinnaanngilarput nunatta isorartunerujussua pissutaalluni inissiani kiassarnermut akiliutaasartut aamma assigiinngittorujussuummata.

Inissiat pisoqarujussuit pisortanit pigisavut akisoorujussuarmik attartortitaraagut. Attartortitalugit akisungaarmata attartortunut isertitakinnerusunut attartortitsisutut attartortut tapertarpagut.

Amerlaqaallu toqqissisimanartumik angerlarsimaffeqarnissamik kissaateqaraluarlutik inissiat pisoqat 1960-kunni allaat sanaajusut suli maannamut najoraat. Allaallu kingullermik ukiut 20-it matuma siorna kingullermik nutarterneqartut. Naatsumik oqaatigalugu aserfallattaaliinnermut malinnaatitsinngilagut.

Oqallisissiaqartup boligsikringip qaffannissaa ilanngullugu oqallisigineqassasoq siunnersuutigivaa. Siumumiit oqaatigissuarput tamatuma oqallisiginissaanut assorujussuaq isumaqataagatta. Boligsikringi ukiut qulit sinnerlugit matuma siorna kingullermik allanngortinneqarpoq. Sanianili kiassarneq, ineqarneq imeq assigisaallu 2006-miit 2014 tikillugu paasissutissani tigusimasatsinni ineqarnermut akiliutit 37,5% angullugu qaffariarsimallutik.

Qulaani taaneqartut qaffakkaluttuinnarnerat pissuteqarpoq inissiat attartortinneqartut pisoqaligaluttuinnarnerannik. Taamaattumik Siumumiit kissaatingaarput ineqarneq tamakkiisumik isiginni-lluni aaqqissuuteqqinneqartariaqartoq. Ineqarnermi pillugu 2012-mi saqqummiisoqarmat Partiit pinngitsoqaratik piviusut aallaavigalugit suliaqaqqittoqarnissaa kaammattuutiginikummassuk.

Oqallisissiaq taamatut naatsumik oqaaseqarfigaarput.

Jess Svane
Siumut